

剑南诗稿

【宋】陆游·著



古典名著普及文库

剑南诗稿

下

【宋】陆游/著
钱仲联/前言
点校



岳麓书社
1998/长沙

校 点 钱仲联
责任编辑 王德亚
封面设计 许康铭

剑 南 诗 稿

〔宋〕陆 游 著

岳麓书社出版发行

湖南省新华书店经销 湖南省新华印刷二厂印刷

1998年9月第1版第1次印刷

开本：787×1092毫米 1/32 印张：59.875

字数：1,500,000 印数：1—3,000

ISBN 7—80520—809—3

I·437 定价：58.00元

如有印装质量问题 请与本社出版科调换

社址：长沙市新民路10号 邮编：410006

卷三十五

浮 生

浮生真是寄邮亭，短鬓匆匆失故青。睡少始知愁有力，病增方叹药无灵。谋生懒似逢秋燕，访旧疏于欲旦星。自笑若为销此恨，浊醪聊复倒余瓶。

秋 夜

高屐枯筇一老翁，灯前自笑发如蓬。泠泠月浸荒庭竹，淅淅风凋古井桐。病思未苏秋尚浅，醉魂初醒情夜方中。故人万里无消息，便拟江头问断鸿。

秋夜纪怀

缺月淡欲尽，老鸡鸣苦迟。聊为待旦坐，不作感秋悲。鲁叟一王法，幽人《七月》诗。平生经世志，老死欲谁期？

又

瞿昙起西域，老氏奋中州。谈理一家说，蠹民千载忧。横流当有自，独立岂相仇。垂世《诗》《书》在，儿童勿外求。

又

北斗垂莽苍，明河浮太清。风林一叶下，露草百虫鸣。病入新

凉减，诗从半睡成。还思散关路，炬火驿前迎。

书 怀

萧飒先秋鬓，龙钟未死身。不惟今日老，已是一生贫。食菜从儿瘦，关门任客嗔。世间余一念，河雒尚胡尘。

林居秋日

桔槔引水绕荒畦，病卧蜗庐不厌低。小聚数家秋霭里，平波千顷夕阳西。亭皋草木犹葱蒨，天上风云已惨凄。逋负如山炊米尽，终年枉是把锄犁。

七月二十四日作

闲拂青铜一惘然，此生应老海云边。凉飈入袂诗初就，幽鸟呼人梦不全。天上鹊归星渚冷，月中桂长露华鲜。射胡羽箭凋零尽，坐负心期四十年！

枕上作时闻临海四明皆大水

抚枕时时犹叹欷，厄穷已极畏凶饥。雨声浙沥孤斋冷，客梦萧条万里归。山邑风雷移蜃穴，海城水潦半民扉。如云秋稼方相贺，一饱还忧与愿违。

书 怀

漫道年来未极衰，穷途憔悴实难支。半分臂减休文瘦，七尺躯存曼倩饥。尚忆青衫陪众隽，宁期白首负明时！悠然万里烟波兴，除却沙鸥总不知。

秋阴至近村

村店闲寻酒，筇枝瘦倚肩。云齐龙卷雨，野旷鹤盘天。露井飘桐后，清觞泛菊前。欲归还小立，搔首意悠然。

闲居自述

自许山翁懒是真，纷纷外物岂关身。花如解笑还多事，石不能言最可人。净扫明窗凭素几，闲穿密竹岸乌巾。残年自有青天管，便是无锥也未贫。

秋雨初霁试笔

墨入红丝点漆浓，闲将倦笔写秋容。雨声已断时闻滴，云气将归别起峰。斜日半穿临水竹，好风遥送隔城钟。远游更动轻舟兴，太息何人解见从？

幽怀

苦茅架竹亦吾庐，病起幽怀得小摅。爱酒已捐身外事，闭门犹读死前书。邻家人喜添新犊，小市奴归得早蔬。但使身安岁中熟，敢辞老境落樵渔！

雨后出门散步

细水穿沙溜，残云扶雨归。不成游酒市，且作倚渔扉。老大徂年速，羈穷壮志违。破裘虽百结，犹胜泣牛衣。

又

病叶常先霁，寒潮只暗生。扶衰赖药石，随意出柴荆。细路牛栏湿，疏篱绩火明。枯荣不须计，千古一棋枰。

秋夜示儿辈

吴下当时薄阿蒙，岂知垂老叹途穷。秋砧巷陌昏昏月，夜烛帘栊袅袅风。缩项鳊鱼收晚钓，长腰粳米出新舂。儿曹幸可团栾语，忧患如山一笑空。

七十二岁吟

七十人言自古稀，我今过二未全衰。读书似走名场日，许国如骑战马时。秋晚雁来空自感，夜阑酒尽不胜悲。渭滨星鬓逾千载，一表何人继《出师》！

雨夜读书

风雨瀕洞吞孤村，读书拥褐不出门。历观忠邪见肝肺，直与治乱穷根原。傅岩之野感帝梦，此事难以今人论。危冠长剑一见用，万里耕桑吾道尊。

又

一灯如萤雨潺潺，老夫读书蓬户间；但与古人对生面，那恨镜里凋朱颜。功名本来我辈事，人自蹭蹬天何悭？君看病骥瘦露骨，不思仗下思天山。

秋 晚

聚落萧条古埭东，芦藩蓬户卧衰翁。井桐叶尽新霜后，衣杵声繁夕照中。身似败棋难复振，心如病木已中空。村醪酸涩君无笑，也解灯前作脸红。

新 菊

已过重阳十日期，菊丛初破两三枝。自怜短鬓萧萧白，不似黄花驿里时。黄花驿在岐凤间，予尝过之。

又

老去流年不耐催，微霜又见菊花开。莫言冷落西风晚，也有飞飞小蝶来。

九月二十八日五鼓起坐

抽架上书得九域志泫然有感

一事无成老已成，不堪岁月又峥嵘。愁生新雁寒初下，睡起残灯晓尚明。天地何由容丑虏，功名正恐属书生。行年七十初心在，偶展舆图泪自倾。

题桥南堂图

平生不识桥南路，闻道清流带烟树。今朝开卷一欣然，恍若身亲到其处。徐郎独立巖如山，招不能来麾不去。旧居万瓦碧浮烟，结茅却就桥南住。雪尽春生水似蓝，想君清啸钓鱼庵。道上红尘高十丈，断无一点到桥南。

题吴参议达观堂堂榜盖朱希真所作也仆少

亦辱知于朱公故尤感慨云

中原遗老雒川公，鬓须白尽双颊红，挥毫为君作斋榜，想见眼中余子空。余子碌碌何足数，独付庄周贾生语。看君践履四十年，始知此公不轻许。公今度世为飞仙，开卷使我神凜然。清时台省要才杰，诸公谁致雒川客？

舍北摇落景物殊佳偶作

今年冬候晚，仲月始微霜。野日明枫叶，江风断雁行。穷涂多藉躏，老境易悲伤。自笑诗情懒，萧然旧锦囊。

又

路拥新霜叶，溪余旧涨沙。栖乌初满树，归鸭各知家。世事元堪笑，吾生固有涯。南村闻酒熟，试遣小童赊。

又

小聚鸥沙北，横林蟹舍东。船头眠醉叟，牛背立村童。日落云全碧，霜余叶半红。穷鳞与倦翼，终胜在池笼。

又

屋角成金字，溪流作縠纹。斜通小桥路，半掩夕阳门。孤艇冲烟过，疏钟隔坞闻。杜门非独病，实自厌纷纷。

又

草径人稀到，柴扉手自开。林疏鸦小泊，溪浅鹭频来。檐角除瓜蔓，墙隅刷芋魁。东邻腩肉至，一笑举新醅。

自嘲

身见绍兴初改元，百罹敢料至今存。生涯破碎余龙具，学问荒唐守《兔园》。独立未除还笏气，余生犹待阖棺论。北窗灯暗霜风恶，且置孤愁近酒樽。

作 梦

作梦今逾七十年，平生怀抱尚依然。结茅杜曲桑麻地，觅句灞桥风雪天。骠骑向来求作佛，淮南末路望登仙。世间妄想何穷尽，输与山翁一醉眠。

夜 坐

杳杳霜钟十里声，娟娟江月半窗明。陈编欲绝犹堪读，微火相依更有情。九曲烟云新散吏，时方被命再领武夷祠禄。百年铅槧老诸生，颓然待旦君无笑，尚胜闻鸡赋《早行》。温岐诗云：“鸡声茅店月，人迹板桥霜。”盖唐人早行绝唱也。

北园杂咏

西村林外起炊烟，南浦桥边系钓船。乐岁家家俱自得，桃源未必是神仙。

又

舍北桥东幽事多，老夫饭饱得婆娑。茅檐日落闻春相，荻浦烟深有棹歌。

又

小桥密接西冈路，支径深通北崦村。老子意行无远近，月中时打野人门。

又

东吴霜薄富园蔬，紫芥青菘小雨余。未说春盘供采撷，老夫汤饼亦时须。

又

锄麦家家趁晚晴，筑陂处处待春耕。小槽酒熟豚蹄美，剩与儿童乐太平。

又

闲伴邻翁去荷锄，林疏历历见村墟。怪生白鹭飞无数，水落滩生易取鱼。

又

短筇行乐出柴荆，雪意阑珊却变晴。林际已看春雉起，屋头还听岁猪鸣。

又

岁残已似早春天，隔水横林一抹烟。闻道埭西梅半吐，携儿闲上钓鱼船。

又

白发萧萧病满身，冻云野渡正愁人。场鞭大散关头日，曾看中原万里春。

又

暮年身似一虚舟，付与沧波自在流。垂地雪云吹不散，且倾桑落脍槎头。

龟堂独坐遣闷

发已凋疏齿已摇，高谈谁与慰无聊？苦心虽呕何由出，病骨非

谗亦自销。玉雪细生蒸瑞草，胭脂小把刷灵苗。防风苗色红如胭脂，可作毡。贺公吴语吾能似，太息遗魂不可招。

又

放逐还山八见春，枯颜槁项雪霜新。大床不解除豪气，凡眼安能识贵人？食有淖糜犹足饱，衣存短褐未全贫。北窗坐卧君无笑，拈起乌藤捷有神。

复窃祠禄示儿子

得饱不啻足，闭门还读书。翁犹羹不糝，儿固食无鱼。袞绣曷加我，箪瓢常晏如。人生随所遇，勿替此心初。

陇头水

陇头十月天雨霜，壮士夜挽绿沉枪，卧闻陇水思故乡，三更起坐泪数行。我语壮士勉自强；男儿堕地志四方，裹尸马革固其常，岂若妇女不下堂？生逢和亲最可伤，岁辇金絮输胡羌。夜视太白收光芒，报国欲死无战场！

雪 歌

黑云黯黯如翻鸦，急霰飒飒疑投沙。初闻万窍号地籁，已见六出飞天花。宁论异事吠群犬，且喜和气连千家。穿帘投隙矜妩媚，平坑塞谷迷谿沓。遥遥林塔出玉笋，渺渺江路蟠修蛇。扣门方拟贳邻酒，篝火更欲寻僧茶。悬知朝士集阙角，靴声入贺趋正衙。吾衰久矣尚何说，所幸一稔均幽遐。

春 近

短褐枯筇老病身，龙钟也复喜新春。已知不解多年住，且作都

无一事人。檐角鸟声呼醉梦，室中花气袭衣巾。朝来更有欣然处，一箸山蔬胜八珍。

望永阜陵

圣主乘乾临斧扆，小臣承诏上丹墀。宁知齿豁头童后，更遇天崩地陷时！泣至眼枯无血续，梦随魂断独心知。白头才尽空濡笔，宁继《生民》《下武》诗。

初拜再领祠宫之命有感

黄纸初开喜可知，追怀平昔却成悲。生当京国承平日，仕及皇家再造时。小草出山初已误，断云含雨欲何施？儿孙贺罢仍无事，却赴幽人把钓期。

醉中信笔作四绝句既成惧

观者不知野人本心也复作一绝

麦野桑村有酒徒，过门相觅醉相扶。朱门日日教歌舞，也有侬家此乐无？

又

过得一日过一日，人间万事不须谋。邻家幸可赊芳酝，红蕊何曾笑白头。

又

今朝卖谷得青钱，自出街头买彘肩。草火燎来香满屋，未容下箸已流涎。

又

老觉人间足畏涂，怕人浑似怕於菟。清明颇动青鞋兴，先探门前有客无。

又

治道巍巍本易成，狂言安得略施行。太平事业人皆见，不计封伦死与生。

腊月十九日午睡觉复酣卧至晚戏作

枕痕著面眼芒羊，欲起元无抵死亡。拥被却寻初断梦，掩屏重拨欲残香。雪云虽散寒犹紧，春意将回昼已长。老去此身无著处，华胥真恐是吾乡。

睡起至园中

春风忽已遍天涯，老子犹能领物华。浅碧细倾家酿酒，小红初试手栽花。野人易与输肝肺，俗语谁能挂齿牙？更欲世间同省事，勾回蚁战放蜂衙。

北园篱外放步

北园西出路逶迤，荆作门扉枳缚篱。锄麦正忙人满野，营巢未定鹊争枝。招呼父老尝新酿，约束儿童筑坏陂。遇兴闲行便终日，隔溪绩火已参差。

岁暮独酌感怀

明时频忝武夷仙，俯仰人间只自怜。总角回思如昨日，挂冠过限已三年。病多晴日思行药，睡少清宵学坐禅。更叹衰孱不禁

酒，地黄一盏即颓然。

盆 池

雨送疏疏响，风吹细细纹。犹稀绿萍点，已映小鱼群。傍有一拳石，又生肤寸云。我来闲照影，一笑整纶巾。

对 食

蓬藿生庭叶拥阶，经旬饭豆爨枯蕕。烟霄旧谓行夷路，薪水今悲系病怀。梦里百年元易过，人间万事苦难谐。痴儿自堕闾黎计，欢喜闻钟已过斋。

蹭 蹬

少慕功名颇自奇，一生蹭蹬鬓成丝。市楼酒美贫何预，斗柄春回老不知。黑帜游魂应有数，白衣效命永无期。鱼梁东畔牛兰北，举世谁能识此悲？

海 棠 图

人间奇草木，天必付名流。菊待陶元亮，竹须王子猷。我为西蜀客，辱与海棠游。再见应无日，开图特地愁。

丁巳正月二日鸡初鸣梦至一山寺名凤山
其尤胜处曰味轩予为赋诗既觉不遗一字

已穷阿閤胜，更作味轩游。不尽山河大，无根日月浮。吾身元是幻，何物强名愁？久觅卓庵处，是间应可留。

初 春

谁把鹅黄染柳丝，似催邻曲蹋青期。已忘万里封侯志，但忆千

回上树时。朝雨池塘光潋潋，暮烟楼观碧参差。紫姑一作行藏。
欲问还休去，身世从来心自知。

雨中作

三日雨频作，昏昏饶睡眠。泥深散酒市，风恶恼灯天。茅屋松
明照，茶铛雪水煎。山家自成趣，抚枕寄悠然。

又

淅淅连江雨，悒悒一室幽。茶甘留齿颊，香润上衣裘。泥滓将
雏鸭，林樊唤妇鸠。短章虽漫兴，聊足散吾愁。

又

短鬓白如丝，梅花似旧时。掩屏愁入梦，隐几雨催诗。病为阴
天剧，春缘闰岁迟。非关畏车马，衰甚实难支。

纵 笔

气本充天地，书非汗马牛。人人见尧舜，世世有巢由。朝市红
尘闹，山村白发稠。所欣吾道在，江汉古东流。

题慧老芋岩

煨芋当时话已新，如今拈出更精神。十年相国非吾愿，半颗君
当别付人。

立春日

江花江水每年同，春日春盘放手空。天地无私生万物，山林有
处著衰翁。牛趋死地身无罪，梅发京华信不通。数片飞飞犹腊
雪，村邻相唤贺年丰。去冬无雪，今年以正月十日巳时立春，而平旦有雪

数片，犹腊雪也。

病中作

老躯百病集，颓然仰天呼。汝病勿怨天，药石幸可扶。寓形天地间，疾病谁能无？不从酒色来，病自无根株。但使元气在，虽剧行当苏。哀哉忿欲子，永弃元化炉。

又

牧羊知治民，解牛得养生，一理倘造微，何事不可明。我老抱病久，颇窥古人情。唐尧授四时，帝道所以成。周家七百年，王业本农耕，造端无甚奇，至今称太平。人生正如此，默默要无营；心君但高拱，万物安能撓！

立春日

花压乌巾酒满卮，旧逢春日恨春迟。如今病卧孤村里，过了新春也不知。

又

庆元丁巳春来晚，人日初过近上元。空对一樽三太息，无人为戴缕金幡！

北望

中原堕胡尘，北望但莽莽。耆年死已尽，童稚日夜长。羊裘左其衽，宁复记畴曩？岂无豪俊士，愤气塞穹壤。我欲友斯人，悲咤寄遐想。梦行黄河滨，云开见仙掌。